

Serie di buki "365 Stora" ta importante

Ministro impresiona cu e proyecto di Edselyn Figaroa



ORANJESTAD (AAN): Den siman Minister di Enseñansa, Michelle Hooyboer-Winklaar a ricibi bishita di escritora Edselyn Figaroa, cu a yega na Minister pa presenta su serie di buki y proyecto 365 storia. Un serie di buki pa mucha skirbi na Papiamentu disañá pa mayornan y educadornan y e mucha mes lesa den nos idioma materno.

"Awe nos a ricibi e bishita di Edselyn Figaroa cu ta e motor tras di e serie di buki 365 storia", asina e Minister a splica. Durante e encuen-

tro a haya un bista completo riba e proyecto aki y e intencion tras di dje. "Nos a keda hopi impresiona cu e proyecto completo y tambe e calidad di e producto pa nos muchanan. E tabata e punto principal di nos combersacion", e mandatario a agrega.

Siguiendoriba e tema, e titular di enseñansa a amplía bisando cu ta bay mira con por introduci esaki na un manera mas formal y structural na school... "y nos a intercambia ideanan rond di esaki. Sigur nos ta mira cu



tin espacio pa por trece esaki na e schoolnan pa muchanan cu lo ta interesa den dje", di acuerdo cu Minister Michelle Hooyboer-Winklaar.

"Algo a largo plaso cu nos lo kier evalua ta e miho forma pa hinca proyectonan asina structural den nos schoolnan.

Nos ta nota cu e material na Papiamentu cu storianan interesante, educativo pa nos muchanan, ta haci cu nos ta hopi habri pa tur esunnan cu tin ideanan asina y mi ta kere cu esaki ta un tremendo iniciativa di Edselyn y nos kier mira si tin espacio na nos schoolnan pa e proyecto di 365 storia", asina e mandatario a termina bisando.



Stories for the Soul

Biblioteca ta start luna di Maart cu curso encuanto spiritualidad



ORANJESTAD (AAN): Mientras cu e cambio di siglo a progresa, e interes pa otro partinan significante di bida a crece! Mas y mas hende ta busca pa comprende e nificacion profundo di bida, e motibo pakico bo ta parti di bida, y e motibo di ta pasa den experiencianan den bida.

Cu e desaroyonan global di relacion humano e ultimo

decadanan aki, e interes aki pa hopi a crece den un demanda pa haya sa mas y comprende humanidad, di comprende bo mes, pa sa loke nos por haci pa ta un punto positivo. E deseo aki pa comprendemento y e deseo cu nos por tin e poder dentro di nos mes pa bin cu cambio positivo y impulsa paz global, ta un spiertamento spiritual cu a manifestá su mes globalmente.

Biblioteca Nacional lo tin un curso special, "Spirituality and Life Values", pa luna di Maart venidero.

E curso lo wordo duna pa Rabbi Daniel Kripper, un orador reconocí y educador di asuntonan di spiritualidad, religion, y psicologia. E ta e lider spiritual actual di Beth Israel, e comunidad Hudiú na Aruba.

E curso lo consisti di cuatro sesion, di 90 minuut cada uno pa siman. E curso lo cuminsa dia 6 di Maart, y lo tin tambe dianan 13, 20, y 27 di Maart. E lo ta for di 5:15 pm te cu 7:00 pm.

Lo cobra un suma tambe pa participacion. Por registra na info@bibliotecanacional.aw